


Maybelline Arends-Croes a haya reconocimiento pa su inmenso aporte na nos Cultura



ORANJESTAD (AAN): Durante un ceremonia masha bunita, Minister di Finansa, Asuntonan Economico y Cultura a duna un homenahe special na señora Aura Maybelline Arends-Croes, miho conoci como Maybelline pa su bunita trayectoria di 50 año formando nos mucha-, hoben- y adultonan musicalmente y su inmenso aporte den ramo musical na Cultura di nos pais. Durante di e agasaho Maybelline su grupo di coronan 'Melange' y 'Young Voices' a pasa door di e trayectoria musical di Maybelline, recordando hopi momentonan bunita cu nan a pasa cu nan 'segundo mama' Maybe. Tambe un bunita video a

keda prepara pa e anochi special aki den cual a duna un resumen corto di e trayectoria musical di Maybelline. E tabata un anochi ameno yena cu canto y bunita anecdota di Juffrouw Maybe, manera Maybelline ta wordo yama cariñosamente. Maybelline ta un persona cu un gran talento musical, poeta, musico, compositor y productor. E tin un trayectoria masha amplio mes riba tereno di musica cu un gran cantidad di logro y reconocimiento.

Pa nombra djis algun logro: El a marca historia dia 18 di maart 1976 dia proclamacion oficial di nos 'Himno y Bandera' ora cu nos Himno Nacional



'Aruba Dushi Tera' a wordo interpreta pa prome bes pa e koor di mucha 'Tutti Fruti' cu ela dirigi. El a wordo condecora pa 'Ridder in de Orde van Oranje Nassau' y a ricibi e prome premio di "Aruba Unesco Music Award". Maybelline a forma parti en total di 22 diferente comision y organisacion. Tambe Maybelline ta miembro honorario di e Comision Celebracion Dianan Nacional. Minister Xiomara na nomber di Gobierno di Aruba a gradici Maybelline pa su contribucion valioso na nos Cultura y e 50 añanan cu ela dedica na formacion musical di nos hubentud riba tereno musical. 'Un danki di curason pa dedica tur e añanan na formacion di nos muchanan como hende, e disciplina cu bo a inculca den e muchanan, e amor pa musica pa asina nos biba nos Cultura y asina sigura nos un futuro cultural valioso' e mandatario a termina bisando.

